

Cingz Minzczuz Vwnzva·Sim Minzczuz Doxgiet

南宁市良庆区南晓镇中心学校六(1)班 Maj Lidingz/马丽婷

Sam nyied sam dwg ngoenzciet Bouxcuengh raeuz. Bineix sam nyied sam, hagdangz dou ciuqgaeuq guh gij hozdung minzczuz vwnzva haeu hagdangz haenx, dou angq dwk ciengq diuz go 《Gyaez Cunghvaz Raeuz》: “Hajcib roek yup ndaundeiq, hajcib roek duj va, hajcib roek minzczuz beixnuengx caemh aen gya, hajcib roek cungj vahgangj gyoebcomz baenz coenz vah ndeu, gyaez Cunghvaz raeuz, gyaez Cunghvaz raeuz……”

Banhcujiyinh Cangh Gez lauxsae, lij miz Luz Cwngz lauxsae, Cangh Siujcungh lauxsae hix daeuj caeuq dou caez ciengq, bouxboux angq raixcaix. Cangh Gez lauxsae daj Gveicouh daeuj, dwg Bouxyaej, Luz Cwngz lauxsae daj Yinznanz daeuj, dwg boux Yizcuz, Cangh Siujcungh lauxsae daj Gyanghsih daeuj, dwg Bouxgun. Geij boux lauxsae caeuq dou gyoengq hagseng Bouxcuengh bonjdieg neix doq ciengq doq humx baenz aen gien ndeu, aen gien minzczuz daih doxgiet ndeu.

Gou cam Cangh lauxsae, mwngz vihmas daj giz gyae baenznyaenx daeuj Nazheuj dou ha?” “Aenvih raeuz dwg ranz vunz ndeu.” Geij boux lauxsae mbouj doengz minzczuz neix daj diegrog daeuj daengz Guengjsae,

daeuj daengz Namzningz, daeuj daengz aen hagdangz Nazheuj dou. Gyoengqde vihliux son saw, vihliux son cienz gij gamjcingz minzczuz doxhuz, caennang bae coicaenh minzczuz doxgiet.

Cangh lauxsae naeuz, gyoengqde Bouxyaej Gveicouh caeuq Bouxcuengh Guengjsae caemh dwg daihlwglan Bouxvet ciuhgonq baihnanz guk raeuz, song aen minzczuz gig doxlumj. Bouxyaej gvaq sam nyied sam, haengj guh haeuxnaengj haj saek daeuj baiqcoj sauqmoh, gamjaen diendeih, gamjaen cojcoeng, gamjaen gwnz-biengz.

Luz Cwngz lauxsae lwnh dou nyi, ngoenz “ciet bogfeiz” Yizcuz loeg nyied ngeihseiq ceiq hoengh, ranzranz gaj yiengz gaj gaeq, cawj megsamgak moq. Aeu nohyiengz nem ngaizmeg doxyaux le dawz bae vanq coh seiqlengq, gouz mbwn baujhoh loegcuk baenz ndei, fouz cai fouz haih. Daengx mbanj vunz comz youq ranz bouxgeq baiqcoj, eu fwen diuq foux. Doek-laeng, gak ranz dawz bogfeiz dauqranz guh “gyaep fangz siu cai”.

Gou gyaez gij fungsug gak minzczuz, guk raeuz miz minzczuz lai, gij vwnzva gak minzczuz gyoebbaenz vwnzva guk raeuz. “Va dog mbouj



baenz cin, seizcin va rim doengh.” Dou dwg lwglan Bouxcuengh, wnggai rox bae swncienz gij vwnzva Bouxcuengh maenhndei raeuz.

Raeuz dwg youq ndaw ranzhung Cunghvaz minzczuz, wngdang henhoh minzczuz doxgiet. Luz lauxsae, Cungh lauxsae gaenq guh ndaej aen yiengh ndei hawj raeuz, caih mwngz vunz dieg lawz, vunz minzczuz lawz, cungj dwg gaenx guhhong, laeglemx okrengz bae henhoh Cunghvaz Minzczuz daih dox-

giet. Dou hix yaek hag yiengh gyoengqde. “Lwngyez ak guk cix ak”, dou yaek daj mwh lwngyez guh hwnj, gyaez minzczuz raeuz, bae henhoh caeuq hawj Cunghvaz minzczuz doxgiet engq ndei, hawj aen minzczuz raeuz ndaej hwngvuengh hwnjdaej, ciengx-lwenx ndwn maenh youq dangqnaq gak minzczuz lajbiengz!

(*lauxsae son' gyauq: Cungh Hihcwngh/钟希增*)



Gou dwg duj fwj angqfaengz ndeu, ngoenzngoengz cungj youq gwnzmbwn caih bae caih youq. Gou mizseiz daenj buhvaq hau, mizseiz daenj buhvaq ndaem; mizseiz mbaeu lumj ceijsa, mizseiz naek lumj goengqbya. Vunzlai cungj gyaez caeuq gou guhcaemz. Mizseiz gyoengq roeg iq daeuj caeuq gou gangj vahseb; mizseiz daxbuz rumz ciengq go ndeidingq hawj gou dingq; mizseiz daxdoeng daengngoengz caeuq gou guh goemqndoj; mizseiz dahcej ronghndwen gangj gojgaeq hawj gou dingq.

Langh miz heiqswi hwnj daengz gyang mbwn le comz guhdoih, liuxle menhmenh hwnjbae daengz gyang mbwn ne couh miz gou lo, ndigah ndaw ndang gou miz haujai raemxfwi. Miz mbat ndeu, gou cingq youq gyang mbwn ciengq go, yawjraen gwnz namh miz geij go nywj iq ngaem gyaeuj youq, gou raen geizheih lai couh cam gyoengq go, nywj iq: “Sou vihmas naiq baenzneix ne?” Gyoengq nywj iq de menmenh ngiengx gyaeuj hwnjdaej, yawj le yawj gou, youh ngauz gyaeuj doiq gou naeuz: “Dou gizneix geij aen singgeiz mbouj doek fwn nauq, gij raemx ndaw ndang dou deng haw bae caez.” Gou ngeix yaep ndeu, uk baez cienq le, couh siuqrumz,

Gij Vah Fwj Gag Lwnh

dangseiz daxbuz rumz couh daeuj lo, de sup heiq gaeuq bae, laep da, haenqrengz boq, neix ndang gou yied daeuj died hung, yied daeuj yied naek. “Hunglunglung, hunglunglung……” Daxgoeng byajraez hix daeuj coengh gou. Dangseiz, gou couh bienqbaenz haujai caek raemx iq, gyoengqde doq ciengq gij go ndeidingq dangqmaz, doq doek roengz gwnz namh bae, go' nywj iq couh ngiengx gyaeuj hwnjdaej, dujva naj riu lo, dah' iq buet bae lai angq lo……

Gou mboujdan gyaez coengh bouxwnq, vanzlij majj cang yienghsiengq ndei! Youq doengh ngoenz

ndit rongh rumz ndei, gou daenj buhvaq hausak, cang mbwnheu ndeiyaew dangqmaz; daengz mbwn yaek muemj le, gou couh daenj gij buhvaq raiz haj saek haenx, dawz mbwn cang baenz lai saek lai yiengh. Vanzlij gou hix rox gij fap Sunhvuzgungh caetcih ngeih bienq, mizseiz bienqbaenz duzdouq hau iq dwggayez ndeu; mizseiz bienqbaenz duzyiengz caih youq caih bae ndeu; mizseiz bienqbaenz duzlunz ak maengh ndeu……

Neix couhdwg gou, fwj caih youq caih bae, fwj cang mbwn gyaeundeih.

(*Yenz Swjhanz*)

Dingq Rox



Mwngz ndaej nyi lwi? Boh ha, mwngz dingq vei! Duzroeg gwnz bya cungj heuh coh gou bw. Gyoengq roeg de iu gou bae gwnz bya guhcaemz bw.

Ndokva gyanghaet bya' ndoi, riu ndaej ceiq van, riu ndaej ceiq gyaeu;

Gyanghaet bya' ndoi, gizgiz cungj miz raemxraiz ndongqndikdik;

Nditndat gyanghaet bya' ndoi, guhlumj raemx-mboq swiq gvaq nei seuqsaw ronghsag;

Gyanghaet bya' ndoi, gyaeu gvaq loqfangzhwnz haemhlwenz.

Gyoengq roeg iu gou bae gwnz bya guhcaemz bw. Duzroeg gwnz bya cungj heuh coh gou bw.

Mwngz ndaej nyi lwi? Boh ha, mwngz dingq vei!

(*Daj《Bonjsei Sim Lwngyez》(Veiz Gizlinz raiz) senj okdaej, Lwgfwnzgmeh/卢奋长 hoiz*)